

AKASHVANI AIZAWL

REGIONAL NEWS BULLETIN

HEADLINES (EVENING)

- 1. Mizoram Assembly chuan 'Ro Min Relsak Ang Che' tih hla Rokunga phuah chu Mizoram State Song a hman turin a pawm.
- 2. Chief Minister Pu Lalduhoma'n Mizo Peace accord chungchangah MNF chu debate puiah a sawm.
- 3. Prime Minister Narendra Modia chuan sawrkarin infiamna lamah tunlai changkanna milin kum zabi 21-naah ecosystem tha tak siam a tum tih a sawi.
- 4. Nepal tuiliana chin hriatloha bo mi sang chuang zingah India mi khualzin 300 dawn an tel ve.

<><><>

STATE SONG-OFFICIAL RESOLUTION

Mizoram Assembly chuan 'Ro Min Relsak Ang Che' tih hla Rokunga phuah chu Mizoram State Song ni turin a pawm.

Chief Minister Pu Lalduhoman vawiin khan house ah Official Resolution pu lutin India Danpuiin state song neih a khap lem loh avangin kumin August ni 10-a Cabinet meeting chuan state song neih ve ngei tula an hriat angin Rokunga phuah 'Ro Min Relsak Ang Che' tih hla chu state song atan hman ni se a ti a. He hla hian Pathian chu hnamtin chungah roreltu leh kulhpui nghet leh Lalber te Lalber a nih zia a puang chhuak a, he hla hi ram rorelnaa Pathian ram tundin a nih zel theihna tura fuihtu leh hun khirh leh harsa paltlang thei tura rinna leh chakna petu ni tura a duh thu a sawi a. He hla hi official-a sak a nih apiangin ding chungin kutphah ding lam lung zawna dahin, rilru tawngtaina nena sa turin an inngen nghal bawk a ti.

He resolution hi member hrang hrangin an sawiho hnuah House chuan lungtual takin a pawm a ni.

<><><>

PEACE ACCORD –CALLING ATTENTION MOTION

Chief Minister Pu Lalduhoma'n Mizo Peace accord chungchangah MNF chu debate puiah a sawm.

Vawiin Assembly Session-a MNF MLA Dr. R. Lalthangliana'n calling attention motion a putluhah, tunhnaia Law Minister ni bawk, Chief Minister Pu Lalduhoma'n Govt. Mizoram Law College-a thu a sawinaah kum 1986-a Memorandum of Settlement sign chu Mizoram leh India inremna ni lovin Mizorama party pakhat leh Home Ministry inremna a ni a, a ropui tehchiam lo tia a sawi chuan Mizote inkarah inhnialna a siam a, hei hi reh tawh se a tih thu a sawi a, hei bakah hian ILP leh Article 371G hnuaia Mizoram special provision te chu central sorkarin duh hun hunah a lak bo theih thu leh inhumhimna atana rintlak loh anga a sawi chuan Mizorama political party hrang hrangte, mithiamte leh mipui nawlpui a thawng hle tih a sawi bawk a ni.

House Leader, Chief Minister Pu Lalduhoma chuan chhangin, hemi chungchang hi an sawi fo dawn a nih chuan Mizoram mipuite chuan thudik an hriat theih nan MNF chu an party atangin an duh ber thlang chhuak se, amah nena debate neihpui turin rawtna a siam tih a sawi a, MNF President Pu Zoramthanga leh Pu Laldenga fanu Dr Rinzuali te pawhin MNF leh India inremna tia an sawi an huat loh laia ama sawi an haw ta bik chu a hriatthiam loh thu a sawi bawk a ni. Khatih hunlaia Mizoram mipui aiawh MP a nihna angin, Pu Lalduhoma chuan remna sign a nih hma khan rawtna a siam a, heti khawpa remna duh Mizoram mipuite chu ko khawmin, he inremna tur a tlangpui chu sawiin, sign turin an duh nge la bei zel turin an duh tih rawn sak a rawt a, Pu Laldenga chuan mipui rawn a tul lo a tih avangin inremna sign-ah hian mipui an tel lova, enge an sign tur pawh an hre lo tih a sawi bawk a ni.

Byte: CM

Chief Minister chuan Mizoramin remna a neih hmaa Central Act Mizorama lo awm tawh sa chu Article 371G chuan a huap lo a ti a, Inner Line Regulation (ILR) chu Article 371G avanga lo awm thar thut a ni lova, kum 153 liamtaa Mizoramin a neih daih tawh a ni a ti a, District Council atanga state thlengin hman a ni a ti a. MNF party hruaituten ILP chu Mizoram sorkar remtihna lo chuan thiah theih a ni lo tih mipui hmaa an sawi thin chuan mipui rilru a hruai kawii avangin a duh lova, Central sorkar chuan ILP thiat tur hian Mizoram sorkar remtihna ni lovin rawn hmasak chauh tur thu a sawi mai a, sawi dal emaw sawi tak emaw lovin, a zia ang taka sawi mai tur a ti.

<><><>

MUALTHUAM N CASE

Home Minister Pu K. Sapdanga'n tunhnaia Mualthuam North-a tualthahna thlengah Police leh Forensic Science-a thawkte thawhrimna zarah thudik tak hriat a ni chu lawmawm a tih thu sawiin, Mizoram district hrang hrangah te District Mobile Forensic Unit (DMFU) din belh zel tum a nih thu a sawi.

Vawiin Assembly Session-a zawhna chhangin, Home Minister Pu K. Sapdanga chuan tunhnaia Mualthuam North-a tualthahna thlengah Police leh Forensic Science Laboratory-a thawkte bakah tualchhung mipuite thawh hona a that avangin thudik tak hriat chhuah a ni chu lawmawm a tih thu a sawi a, tun dinhmunah MINECO, Khatla, Aizawl-a Forensic Science Laboratory directorate office pakhat bakah District 3-Aizawl, Lunglei leh Champhaiah te District Mobile Forensic Unit (DMFU) din a ni tawh a, district dangah te pawh siam belh zel tum a nih thu House a hrilh.



MPCC

Mizoram Pradesh Congress Committee (MPCC) chuan BJP sorkarin ram mipuite National Song Vande Mataram a vaia sak luih tir a tumna chu ram leh hnam leh sakhua a him zel theih nan an do zel dawn tih an sawi.

He thu hi vawiina Aizawl Press Club-a thuthar thehdarhtute an kawmnaah sawiin, MPCC President Pu Lalthanzara chuan tun thla ni 19-a Congress Working Committee (CWC) inhmukhawm chuan BJP Sawrkar in Vande Mataram, India mipui sak luih tir an tum chu ngun taka a ngaihtuah hnuah kum 1937 a CWC in an lo rel tawh angin hla chang 1-na leh 2-na chauh chu sak nise tiin thluthlukna an siam an ti a. Hemi thuthlukna an siam chhan chu a chang 1 na leh chang 2 na chu ram hmangaihna thu leh hla a nih laiin, a chang dang erawh chu Hindu pathian Durga leh Lakshmi biakna leh fakna thu a nih avangin sakhaw dang be tu leh ringtu te tan sak a rem ve loh vang tih an sawi a ni.

Mizoram Pradesh Congress Committee chuan ram leh hnam leh sakhua a him zel theih nan Vande Mataram a vaia sak luih tir tumna chu an do zel dawn tih sawiin, India chu sakhua zalenna ram a nih angin, hnam leh sakhua inthliarna awm lova zalen taka khawsa tlang ho tur an ni tih an sawi a ni.

Byte: Mpcc president

Hei bakah hian MPCC chuan Foreign Contribution (Regulation) Amendment Bill, 2026 in a tum ber chu ram pawn atanga tanpuina hmanga minority leh Christian ten India ram mipui te tana lo din school, college, hospital leh charity home chhuanlam chi hrang hrang hmanga tihtawp leh chhuhsak tumna a ni a, a bill-ah Chiang takin a in ziah avangin Congress Party chuan tha an ti lo a, an do zel dawn tih an sawi bawk a ni.



NATIONAL SPORTS DAY

Govt Saitual College chuan ram chhung hmun dangte rualin an College Auditorium-ah National Sports Day an hmang.

Khelo India Saitual District Representative Laltleipuia chuan hun hmanpuuin, Khelo India chuan naupangte hmakhua ngaiin infiamna kawngah theihtawpa chher mek an nih thu te, an thil tihma kawng tinrengah engkim neitu Pathian neitu ni hmasa turin a chah a, Saitual district ah chuan Khelo India hnuaiah Football leh Wrestling naupangte zirtirin ngawrh taka kalpui mek a nih thu a sawi bawk.

National Sport day-ah hian zirlai leh zirtirtu 147 ten hun an hmang thei a, College Week an hmang chhunzawm nghal a ni.



AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Naktuk zing dar 7 leh a chanve-ah Chanchinthar puan leh a ni ang.

<><><>

PM

Prime Minister Narendra Modia chuan sawrkarin infiamna lamah tunlai changkanna milin kum zabi 21-naah ecosystem tha tak siam a tum tih a sawi. Vawiina Khelo India Dialogue ah video conference kaltlanga he thu hi sawiin Pu Modia chuan sports university te chu training centre changtlung taka siam tum anih thu sawiin ramchhunga theihna nei infiammite kawng tinrenga chhawmdawl an ni a ti a. Pu Modia chuan infiamna chu medal lakah ringawt a ingnghat lo tih sawiin ram changkanga India siamna tura infiamna hmanga India theihna tihpumkhat leh thalaite theihna hman tangkai a ni a ti bawk.

He huna thusawitu dang Union Minister for Youth Affairs and Sports Mansukh Mandaviya chuan Prime Minister Narendra Modia kaihhruaina hnuaiah infiamna chu ramina ngaihpawimawh hmasak anih thu leh thalaite thuamchakna tura hmanraw pawimawh tak a ni a ti.

<><><>

INDIA-NEPAL

Nepal tuiliana chin hriatloha bo mi sang chuang zingah India mi khualzin 300 dawn an tel ve. Nepal Foreign Minister Shisir Khanal sang chuang chin hriatloha bo an chhinchhiah zingah India mi 300 dawn an tel a ti a. Hetihlai hian Nepal Police te chuan tuilian avanga thi zat chu 162 an tling tawh a ti a.

Puan tawh angina India chuan Nepal sawrkar chu tuilian tuarte chhanchhuah leh chhawmdawl hnuaa puih theihna awm zawng zawngah puih a tiam a. President Droupadi Murmu-i chuan Nepal President Ramchandra Paudel hnenah an chhiatna tawh chu a tawrhpuithu sawiin chhanchhuah hna leh chhawmdawl hna thawh mekah India chuan Nepal sawrkar puih a intiam a ti.

Vice President CP Radhakrishnan pawhin Nepal tuilian tuartute a tawrhpuithu a sawi.

Prime Minister Narendra Modia chuan nimin khan Nepal PM Balendra Shah biain tuilian avanga chhiatna thlengah a tawrhpuithu a hriih a ni. India mipuite chuan Nepal unaute an tawrhpuithu sawiin an mamawhna apianga pui turin an inhuam a ti bawk.

<><><>